

# Xroon tsikjin ndo Santiago

**Ndo Santiago tsikjin ndo xroon tsayé'e kain sen tsichjeke'e ngata'a nunte xasintajni**

**1** <sup>1</sup> \*Jan'an Santiago, nta'a ixra ngajin ndo Dio ko ngajin Ncháina Jesucristo, tjá'anta juajna kain ja'anta ti tsikachrjenixinnta ti teyuu chjen'en ndo Israel ko tsichjeke'enta ngata'a nunte xasintajni.

**Ndo Dio tajon ndo ti jian xraxaon chujni**

<sup>2</sup> Ja'anta kichuuna, maski tangi stetatsinganta ngata'a nunte nti'i, ja'anta take'énta juaxruxin. <sup>3</sup> Ó no'anta ixi siá xrojan nge'e tangi tintekon'annta, me'e tsono'anta siá nduaxin ja'anta chuntianta Ncháina Jesucristo ko me'e ritanginta ko soji tsinteenta. <sup>4</sup> Ko chon'énta ixi ti tangi me'e sinche'e ixra ngaya asáanta. Me'e ícha tsontjúá asáanta, ko jian sinche'enta ko xro'an nge'e tsitjáñe'e asáanta. <sup>5</sup> Ko siá xrojan ja'anta titjáña tsono'anta nge'e ti jian, ja'anta tjanche'enta ndo Dio, ko je'e ndo xrotjáanta ndo

tsienxinnta jian, ko je'e ndo tjenge'a ndo nge'e tajon ndo. <sup>6</sup> Ja'anta nchakon tjanche'enta ndo Dio naa nge'e, chuntianta ixi nduaxin tsayé'enta nge'e juanchianta, ixi ngisen titikaon'a tsayé'e sen xrojan nge'e tjanchia sen, sen me'e ton'en sen xranchi ndachaon toncheka chrinto nango ko nango. <sup>7</sup> Ixi sen titikaon'a, tsono'e sen ixi Ncháina Jesucristo tsajon'a ndo nge'e juanchia sen <sup>8</sup> ixi jai xraxaon sen naa nge'e ko ndúya íjngo nge'e xraxaon sen, sen me'e je'a jian nche'e sen.

<sup>9</sup> Sen kichuuna, sen chóna'i kueya nge'e, sen me'e ícha xroché'e sen ixi ícha tjintee sen ngajin ndo Dio. <sup>10</sup> Sen chóna kueya nge'e, sen me'e juaxruxin tsake'e sen kaxon nchakon ndo Dio tsajon ndo juachaxin xro'an nge'e xrochóna sen, ixi kain ni kueya chóna, ni me'e tson'en na xranchi tsjo'e ika. <sup>11</sup> Hora xrochrin'in nchakon ko tsango tsania chjiixro, ika xroxema ka, ko tsjo'e ka xrochjejin tsjo, ko tsitjáña ti chaxro bakikoni ka. Jaña tson'en ni chóna kueya

nge'e ko itsjé tomi, tsen'en nā ko tsitjáña kain ti ixrā juinche'e nā.

**Sen chúxin ndo Dio chao  
tsatsinga sen ti tangi tsii**

<sup>12</sup> Juaxruxin tsake'e sen kichuuna nchakon tsii juachjaon ngata'a sen ko soji tsake'e sen, ixi sen me'e tsayé'e sen juachaxin tsechón sen kain nchakon, jaña tsindachro ndo Dio tsayé'e kain sen nduaxin tjue'e ndo. <sup>13</sup> Nchakon xrojan ja'anta tjaunnta sinche'enta ti ndako'a, ndachro'anta ixi ndo Dio tsikake'e ndo me'e. Ndo Dio jian ndo ko je'e ndo nche'a ndo ti ndako'a jii, ko ni ña'i chónda'i juachaxin tsakaon nā ndo, ko je'e ndo take'a ndo गया aséenni ti ndako'a sinche'eni, <sup>14</sup> ixi nchakon xrojan chujni tjaun nā sinche'e nā ti ndako'a, je'o nā take'e nā गया aséen nā ti ndako'a sinche'e nā. <sup>15</sup> Ko ti ña'i xraxaon chujni tjongíexin ti ndako'a, ko ti ndako'a ícha tangi गया aséen nā, kondeexin me'e teenxin chujni.

<sup>16</sup> Jan'an tjua'anta kichuuna, xraxaon'anta ti ndako'a. <sup>17</sup> Kain nge'e jian ko kain nge'e chaxro tayé'ena, kain me'e tixin ngajní ti jii Ndotáina Dio, ndo tsijinchekonchjian kain xro'i jii ngajní. Ko je'e ndo, ti ndachro ndo ko ti xraxaon ndo tindoxin'a, ko xro'an tsa'on jii ngajin ndo. <sup>18</sup> Jainá jongíexinna íjngo ixi ti chijni chjaina je'e ndo ixi jaña jueña ndo ko jaina ikjanna

xranchi naa nge'e ícha sa'ó juinchéña je'e ndo.

**Chujni sinche'e ti  
ndachro chijnie ndo**

<sup>19</sup> Méxin, ja'anta kichuuna, kainnta jian tin'ennta ko taka'i xronichjanta ko taka'i tsoñaonta. <sup>20</sup> Ixi sen taka toñaao jua'i nche'e sen xranchi tjaun ndo Dio. <sup>21</sup> Ko xrokonda tintu'enta kain ti ña'i ko ti ndako'a nche'e íkaxin chujni ko ja'anta tsitikaonxinnta ixi nchijíi asáanta chijnie ndo Dio kuaye'enta, ixi chijni me'e xrotjáanta juachaxin tsarichonnta kain nchakon.

<sup>22</sup> Ko xrokonda sinche'enta ti ndachro chijnie ndo Dio. Je'a je'o tsin'ennta ixi siá je'o tsin'ennta ko sinche'anta, ja'onta rincheye'é asáanta. <sup>23</sup> Méxin, sen tin'en chijnie ndo ko nche'a sen ti ndachro chijni, sen me'e nche'e sen xranchi naa chujni jitsjexin xrosenda ikon sen, <sup>24</sup> me'e tsje'e sen ikon sen ko hora satji sen, taka tjáñe'e sen xranchi bikon sen ikon sen.

<sup>25</sup> Ko sen tjáñe'a nge'e kuin'en ko jian jitsje'e sen nge'e ichro chijnie ndo ixi chijni me'e tsingijna sen tsintu'e sen kain nge'e ti ndako'a kuanche'e sen, ko soji tsintee sen, sen me'e juaxruxin tsake'e sen kain nchakon.

<sup>26</sup> Siá xrojan ngisen ndachro ixi tsango titikaon sen ndo Dio, ko ndako'a nichja sen, sen me'e ncheye'e sen aséen sen,

ko xro'an xréé ti ndachro sen titikaon sen. <sup>27</sup>Ngisen nduaxin jian titikaon ndo Dio ko xro'an nge'e sínká sen ngajin Ndo, sen me'e xrokonda jaña sinche'e sen: tsingijna sen xjan nóa ko kaxon sen ka'an, sen jitatsinga juachjaon, ko sinchekitja'i aséen sen ixi kain ti ndako'a jii ngata'a nunte xasintajni.

**Xrokonda xraje'o  
xrotjue'eni kain chujni**

**2** <sup>1</sup>Kichianna, ja'anta ti chuntianta Ncháina Jesucristo, ndo tayé'e kain juasaya, xrokonda ja'anta xraje'o xrotjue'enta kain chujni ko tinche'anta chujni xrotjue'enta.

<sup>2</sup>Nchakon xroxra'unta ixi tsajonnta juasaya ngajin ndo Dio ko tsii naa xi, xi chónnda kueya tomi ko jian jitsáa xa ko jiá kuchaningo itja xa, ko hora me'e kaxon tsii naa xi nóa ko chaxro'a jitsáa xa.

<sup>3</sup>Ko siá ja'anta chaxro xronichje'enta xi jitsáa jian ko xrondachenta xa: “Nti'i chaxro take'énta”, ko xi nóa xronichje'anta xa ndako ixi xrondachenta xa: “Ja'a tjasán o take'é nunte no ndá'a.” <sup>4</sup>Ja'anta me'e índako'a stenché'enta ixi je'a xraje'o kuiye'enta kayui chujni.

<sup>5</sup>Ja'anta kichuuna tsango tjua'anta, tin'ennta ji'i: Ndo Dio tsikinche'e ndo sen nóa jii ngata'a nunte nti'i ixi je'e sen ícha tjintee sen ixi chuntia sen ndo Dio, ko sen me'e jai tsayé'e sen juachaxien ndo ko tsii nchakon tsayé'e sen

juachaxin tixin'in sen ti tetuan'an je'e ndo ixi jaña tsindachro ndo tsayé'e kain sen tjue'e ndo.

<sup>6</sup>Ko ja'anta chinga nchekuunta sen nóa ixi tjue'anta sen. Ko ni chónnda itsjé tomi, ni me'e tjenga'i nā 'nā jian ixrā nche'enta ko tingakjinnta nā ngajin xi tetuan'an ixi titikaonnta ndo Dio. <sup>7</sup>Ixi ni chónnda kueya tomi, ni me'e ícha chinga nichjangí'e nā ndo Jesús, ndo tituan'an ja'anta.

<sup>8</sup>Ja'anta siá nduaxin titikaonnta ti tetuan'an ndo Dio xranchi nichja xroon: “Xrokonda xrotjue'enta ni kichuunta xranchi tjue'enta asáanta”, me'e jian nche'enta.

<sup>9</sup>Ko siá je'a xraje'o tjue'enta ni kichuunta ko tinche'enta ngisen tjue'enta, me'e tamanta ijie ko titikaon'anta chijnie ndo Dio.

<sup>10</sup>Siá jii naa sen titikaon kain ti kuetuan'an ndo Dio ko naakua nge'e kuitikaon'a sen, ixi me'ó tama sen ijie ixi nche'a sen kain nge'e kuetuan'an ndo Dio.

<sup>11</sup>Ixi je'e ndo Dio ndachro ndo: “Ja'anta sen nchri ko sen xi ti ó tsikuta'anta xrochonda'inta inaa nchri o inaa xi, nchri je'a janchri'anta o xi je'a ndoxi'anta”, ko kaxon tsindachro ndo: “Jua'i naatónaxónnta ni kichuunta.” Ko siá ja'anta chonda'inta inaa nchri o inaa xi, ko naakónaxónnta naa chujni, me'e ó kuamanta ijie.

<sup>12</sup>Méxin, xrokonda jian nichjanta ko jian nche'enta ixi tsii nchakon sinchéña ndo Dio ijie ngajinnta xranchi nichja chijni chónnda ijie juachaxin sinchemé'e kain ijie.

<sup>13</sup>Méxin, sen bikonóe'a sen kichuu, sen me'e kaxon nchakon tsoñá ijie, ndo Dio tsikonóe'a ndo sen. Ko sen tikonóe'e sen kichuu sen, sen me'e kaxon ndo Dio tsikonóe'e ndo sen nchakon sinchéña ndo ijie.

**Ti chuntiana ngajin ndo Dio, xrokonda sinche'ena ti jian**

<sup>14</sup>Ja'anta kichuuna, xro'an tjtintee síá xrondachronta ixi tsango chuntianta Ndotáina Dio ko tingijna'inta ni kichuunta. Xrokonda nduaxin tsingijnanta ni kichuunta, je'a je'o xronichjanta. Síá sinche'anta jaña, ti ndachronta chuntianta Ncháina, ¿á me'e tsingijna'inta tsachrje ijie chondana? <sup>15</sup>Síá naa sen kichuuna, sen xi o sen nchri, xro'an nge'e chónnda sen tsetsáa sen ko xro'an nge'e chónnda sen sine sen ngujngu nchakon, <sup>16</sup>ko jaína xrondachena sen: “Itjinta jian ko intentana ko tin'innta ko jian taritsfinta”, ko síá jaína tajon'ana nge'e xrokonde'e sen, ti nichjana me'e tjtinte'a. <sup>17</sup>Ixi ti xrondachrona chuntiana ndo Dio xrokonda tsingijnana ni kichuuna. Síá sinche'ana jaña, ti ndachrona chuntiana ndo Dio xro'an tjtintee.

<sup>18</sup>Ko síá xrojan ngisen ndachro: “Ja'a chuntia ndo Dio, ko jan'an ícha tingijna chujni.” Ja'a ndachjijiana xranchi chuntia ndo Dio, ko tingijna'ia chujni xrokonde'e, ko jan'an tsjáko'a xranchi nduaxin chuntia ndo Dio

ixi tingijna chujni. <sup>19</sup>Ja'a titikáoan ixi je'o naa ndo Dio jii ko jaña jian xraxaoan, ko kaxon espíritue Xixron'anxrée jaña titikaon ko xranga ixi xronka. <sup>20</sup>Ja'a tóná'nia ninta, titikáoan ixi ti chuntiana ndo Dio xrokonda tsingijnana ni kichuuna, ko síá sinche'ana jaña, ti ndachrona chuntiana, tjtinte'a.

<sup>21</sup>Ndotáina Dio ndachro ndo ixi jian junche'e ndotáchri'ina Abraham, nchakon kuitikaon ndo, xrokuajon ndo chjen'en ndo, xjan Isaac, xrokuen'en xjan ngata'a ixro xrokuayé'e ndo Dio. <sup>22</sup>Méxin, ja'anta tienxinnta jian ti juakoxin ndo Abraham, je'e ndo chuntia ndo ndo Dio ko kuitikaon ndo ixi xrokuajon ndo chjen'en ndo, ko méxin, ti chuntia ndo ícha tjtintee.

<sup>23</sup>Jaña kon'en xranchi jitaxin xroon chijnie ndo Dio: “Je'e ndo Abraham soji chuntia<sup>a</sup> ndo ndo Dio, méxin, ndachro ndo Dio ixi komé'e jíee ndo Abraham”, méxin ndachro ndo Dio ixi je'e ndo tjento ndo ndo Abraham.

<sup>24</sup>Xrokonda jian tsiexinnta ixi ndo Dio tsayé'e ndo chujni ixi ti jian nche'e ko je'a je'o ndachro sen ixi chuntia sen ndo.


<sup>25</sup>Jaña kaxon nchri Rahab, maski sa'ó kuachónnda nchra itsjé xi, nchakon kuiji sen israelita tjanéee nchra, je'e nchra kuajon nchra juachaxin kuitu'e sen ndo'a nchra ko bingijna nchra sen sajuixin sen inaa cha'o ixi tjaun ni tjanéee nchra naaxrokónaxón na sen,

<sup>a</sup> 2:23 *chuntia* tener fe

méxin, ndo Dio jian kuayé'e ndo nge'e juinche'e nchra nchakon je'e nchra bingijna nchra sen. <sup>26</sup>Jaña ti cuerpoe chujni siá chónnda'i aséen, me'e xrondachro ixi ó tsiken'en, ko jaña kaxon siá chuntiana ndo Dio ko tingijna'ina ni kichuuna, ti ndachrona ixi chuntiana ndo Dio, tjinte'a.

### Ro'anta ndako xronichja


**3** <sup>1</sup>Kichuuna, kueya'i ja'anta tsingakuenxinnta sinchekuen'ennta chujni chijnie ndo Dio ixi siá ndako'a sinchekuen'ennta chujni, me'e ja'anta ícha soji tsóña'anta ijie. <sup>2</sup>Kainna ndako'a nichjana, ko siá jii ngisen jian nichje'e sen sen kichuu sen ko xro'an chijni ndako'a tachrxexin ro'a sen, sen me'e ícha tjúá aséen sen ko chao tetuen'en sen nchijíi cuerpoe sen. <sup>3</sup>Ji'i jii xranchi naa kunxin, tsake'e nã chika ngayá ro'a ba ixi



*Take'e nã chika ro'a kunxin  
(Stg. 3:3)*

jaña chao tsitikaon ba ko ndako itsji ba. <sup>4</sup>Tsje'enta kaxon xranchi ste ntābarco: maski tsango ijie ntāa ko tsango soji chrinto toncheka ntāa, xi teka ntāa chao tituen'en xa ntāa ixi chónnda ntāa naa ntāa nchíín tekáxinni ntāa. <sup>5</sup>Jaña nejenni kaxon. Maski tsango nchíín, nchakon nichja tsango nchejéi nge'e nichja, ko ti nichja me'e xranchi naa xro'i nchíín nchekakiin nchijíi naa ijna. <sup>6</sup>Jaña nejenni jii xranchi naa xro'i ko hora nichja ti ndako'a, me'e ncheni'e nchijíi aséenni ko cuerpoe. Nge'e ndako'a nichjani me'e tsitjáñaxin kain nge'e jian jii ngayá aséenni, ko tsitjáñaxin kain chujni tin'en nge'e nichjani ixi Xixron'anxrée nchekateya xa ixi ndako'a xronichjani. <sup>7</sup>Chujni chao sinchesancho kain iko jie'e jii ntajie, ko kain iko tjanga ko kunchee ko iko jingangi ndachaon,<sup>b</sup> kain iko me'e chao tsetuen'enni ba. <sup>8</sup>Ko nejenni jua'i tsetuen'enni ixi ti nichja chónnda xranchi xrokjui xroanyua tsenxin aséen chujni. <sup>9</sup>Ro'ana tajonxinna juasaya ngajin Ndotáina Dio ko kaxon ro'ana tengexinna teka chujni, chujni juinchéña ndo Dio xranchi je'e ndo. <sup>10</sup>Kaxon ixi ro'ana tajonxinna juasaya ngajin ndo Dio ko kaxon ro'ana tjankataxinna ijie ngajin ni kichuuna. Kichuuna, nche'anta jaña ixi ndako'a me'e. <sup>11</sup>Ti no

<sup>b</sup> 3:7 *ndachaon* mar



*Ngisen tenga xrochon'en sen tsandáa sen  
(Stg. 3:18)*

tachrjetóxin inda, tachrje'a inda tsjen ko kaxon nda tsjá. <sup>12</sup>Kichuuna, ¿á chao naa ntaa tu higo tsajon ntaa kaxon tu aceituna o ntaa tajon tu uva tsajon ntaa kaxon tu higo? Kaxon jua'i ti no tachrjetóxin nda tsjen tachrjexin nda tsjá.

**Ti nduaxin xraxaonna  
jian ti'x̄in ti jii ndo Dio**

<sup>13</sup>Siá jii xrojan ngisen ngakjen'ennta, sen tsango no'e ko tienxin jian, sen me'e xrokonda sinche'e sen jian ko xronichja sen jian ko sinchejié'a aséen sen ixi ti tsango jian no'e sen. <sup>14</sup>Ko siá ja'anta tochjuya'anta me'e sinchetsjá asáanta, ko siá ja'onta tjaunnta sinche'enta kain nge'e, me'e sinchejié'a asáanta ixi nge'e ti no'anta ixi me'e xrokjui xranchi xrojuincheyanta ko ndachro'anta ti nduaxin. <sup>15</sup>Siá jaña nche'enta, ti no'anta me'e je'a ndo Dio kuajon, me'e tsjinchiinta ixi chujni jii ngata'a nunte, chujni titikaon'a ndo Dio ko me'e ti

tajon Xixron'anxrée. <sup>16</sup>Ti no jii chujni chjuye'e ko ti tjaun je'o tsetuan'an, nti'a jii ti ncheketoni ko kain ti ndako'a. <sup>17</sup>Ko sen jian tsienxin ko jian xraxaon ti me'e ti'x̄in ngajin ndo Dio: sen me'e xrokonda tsjako sen ixi jian aséen sen ko tseto'a sen ko tsingijna sen chujni ko tsitikaon sen ti jian ndachro sen kichuu sen, ko tsikonóe'e sen chujni ko jian sinche'e sen, ko xronichja sen ti nduaxin. <sup>18</sup>Ko sen tjaun tsake'e juaxruxin xrokonda tsingijna sen sen kichuu sen kaxon tsake'e sen juaxruxin, ko jaña tsintee sen juaxruxin xranchi tjaun ndo Dio.

**Sen ícha tjaun nge'e jii  
nunte xasintajni**

**4** <sup>1</sup>¿Ti no ti'x̄in ti ncheke'to kichuu tjajna ko ti no ti'x̄in ti tetōku'u kichuunta? Kain ji'i tachrjexin ngaya asáanta. <sup>2</sup>Ja'anta tsango tjaunnta xrochondanta xrojan nge'e, ko jua'i te'nanta, me'e toñaonta ko tjaunnta naatsōñaxónnta

chujni. Tochjuya'anta ixi jua'i chondanta nge'e tjaunnta, méxin, tətoku'unta chujni. Ko jua'i taye'énta nge'e tjaunnta ixi ja'anta tjanche'anta ndo Dio. <sup>3</sup>Tjanchianta ko jua'i taye'énta nge'e tjaunnta ixi ndako'a tjanchianta, ko ti tjanchianta tayé'anta ixi je'o tjaunnta sinchecháxin asáanta. <sup>4</sup>Méxin ja'anta ikjannta chujni titikaon'a ndo Dio. ¿Á noa'i ja'anta ixi siá tsango tjue'enta kain ti ndako'a jii ngata'a nunte xasintajni,<sup>c</sup> méxin ikjannta xranchi ni ningakon'en ndo Dio? Ngisen tjento nge'e ndako'a ton'en ngata'a nunte, sen me'e jua'i tsjento sen ndo Dio. <sup>5</sup>Á xraxaonnta ixi ti nge'e ndachro xroon chijnie ndo Dio tjinte'a ixi ja'in ndachro: “Ixi Espiritue ndo Dio kuaye'ena me'e xronchro ixi je'o ngajin ndo xrochuntiana.” <sup>6</sup>Ndo Dio tsango tingijnana ndo, ko xroon chijnie ndo ndachro: “Ndo Dio ningakon'en ndo kain chujni tsango nchejié aséen, ixi je'e ndo tjue'e ndo kain chujni nchejié'a aséen.” <sup>7</sup>Tintu'enta ndo Dio tsetuan'annta ndo. Titikaon'anta ti ndachro Xixron'anxrée ko je'e xa satsjixin xa ti ste ja'anta. <sup>8</sup>Tonchjiñe'le ja'anta ngajin ndo Dio, ko kaxon je'e ndo tsonchjiñe'le ndo ngajinnta. Nchetjúá asáanta kain ja'anta ti tjue'enta nge'e ndako'a jii ngata'a nunte ko

kaxon tjaunnta xrotjue'enta ndo Dio. <sup>9</sup>Tsjanganta ko tuyakonta ko ncheni'e asáanta. Ko tindoxinnta ti tjanonta ko jai tsjanganta, ko ti chá'anta jai tsoni'e asáanta. <sup>10</sup>Nchenchíin asáanta ngajin ndo Dio ko je'e ndo jian xronichja ndo ixi ja'anta.

### Chungíe'anta ni kichuunta

<sup>11</sup>Kichuuna, nichja'inta kontree sen kichuunta ixi kain sen nichja kontree sen kichuu, xrokjui xranchi xronichja sen kontree chijnie ndo Dio. Ko siá jaña nichja sen ikjan sen xranchi naa xi nchéña ijie, ixi titikaon'a sen ti tetuan'an ndo Dio. <sup>12</sup>Ixi je'o je'e ndo Dio kuajon ndo ley tsitikaon chujni, ko je'o je'e ndo tikinixin'en ndo sinchéña ndo ijie o tsjankata'a ndo chujni ijie, ko chónnda ndo juachaxin sinchemé'e ndo ti ndako'a juinche'e chujni. Méxin, ¿sonda ja'anta nichjanta kontree ni kichuunta?

### Noa'inta siá ndúya tsarichonnta

<sup>13</sup>Ja'anta ti ja'in ndachronta: “Jai o ndúya itsjina tjajna ijie ko nti'a tsojuna nchijíi nano ko sintu'una ixra ko tsjachana itsje tomi.” <sup>14</sup>Ko ja'anta noa'inta nge'e tson'en ndúya, á xratsarichónnta o na'i. Jajina stena nti'i ngata'a nunte xranchi naa tjuinunte; tonoxin tjuj naa nchion ko

<sup>c</sup> 4:4 *xasintajni* mundo

tjume'e titjáña tjuj. <sup>15</sup>Ja'anta xrokonda ja'in xrondachronta: "Siá Ndotáina Dio tsajon ndo juachaxin tsechónna ndúya, me'e sintu'una ngixe'i ixra." <sup>16</sup>Ko ja'anta hora nichjanta tsango nchejié asáanta, ko ti ndachronta me'e ndako'a jii. <sup>17</sup>Ixi ti sen no'e nche'e ti jian ko nche'a sen, sen me'e tama sen ijie.

**Chijni nchexraaon chujni chónnda itsjé nge'e**

**5** <sup>1</sup>Tin'ennta ja'anta chujni chónnda itsjé tomi ko itsjé nge'e, ja'anta tsjanganta ko tuyakonta ixi tsii juachjaon sincheni'e asáanta <sup>2</sup>\*ixi kain ti tjintee chondanta, tsirenga; ko manta sterianta tsiki'i kuchii. <sup>3</sup>Ko tsiki'ixien kain chika oro ko kain chika plata richondanta, ko ti tsitjo me'e tjakoxin ti ndako'a nche'enta, ko xro'i chexin kain nge'e, jaña tsitjáñaxin ja'anta. Itsjé tomi ko itsjé nge'e kuasintjanta kain nchakon ji'i, ko noa'inta ixi nchakon ji'i ó tsjexin nunte xasintajni. <sup>4</sup>Sen juinche'e xráanta nchakon kuandáanta, jitsjangaxin sen tomie sen tasinke'enta sen, ko Ndo Dio, ndo chónnda kain juachaxin, kuin'en ndo ixi sen nche'e ixra stetsjangaxin tomie sen. <sup>5</sup>Ngata'a nunte nti'i, ja'anta tsango nchexruantanta, ko kain juaxruxin chondanta, ko xranchi iko tjontao, jaña stetjontao

ja'anta, ko tuinxin xranchi tsen'en je'e ba, jaña tsen'en ja'anta. <sup>6</sup>Ja'anta juankata'anta ijie ko naa kónaxónnta chujni xro'an ijie chónnda, ko chujni me'e xro'an nge'e juinche'e sen.

**Nichje'enta Ndo Dio ko chon'éntta tsjate'e ndo**

<sup>7</sup>Kichuuna, take'énta juaxruxin ixi ó tsii nchakon tsii Ncháina Jesús. Chon'éntta xranchi sen tenga nokéen, je'e sen chón'en sen tsii ichrin tsengaxin sen ko ichrin tsicháxin nge'e benga sen, ixi tsii nchakon tsandáa sen. <sup>8</sup>Jaña ja'anta kaxon chon'éntta ko soji tinteenta ixi ó tsii nchakon xrokjan Ncháina Jesucristo. <sup>9</sup>Kichuuna, tjangie'a kichuunta ixi jaña ndo Dio tsjankata'inta ndo ijie ixi je'e ndo, ndo nchéña ijie, ó tuinxin tsii ndo. <sup>10</sup>Kichuuna, tsje'enta xranchi tangi ko ijie juachjaon kuatsinga sen profeta ko je'e sen juaxruxin bake'e sen, sen kuachónnda juachaxin nichjatin sen nombrée Ndotáina Dio. <sup>11</sup>Jaña ndachrona ixi je'e sen juaxruxin bake'e sen maski kuatsinga sen ijie juachjaon. Ja'anta ó kuin'ennta xranchi ndo Job bikixi'en ndo kain nge'e kon'en ndo, ko xranchi ndo Dio bingijna ndo ti ó juexin kuatsinga ndo juachjaon ixi Ndotáina Dio tsango tjuaina ndo ko tsango tikonóa'ina ndo.



<sup>12</sup> \*Kichuuna, jan'an ntatjunta ndachroxin'anta nombrée ndo Dio jii ngajní ǒ nunte nti'i ǒ ngixe'li naa nge'e jii ngata'a nunte ixi nduaxin nge'e ndachronta ixi nchakon xrondachronta jaán, jaña tson'en, ko nchakon xrondachronta na'i, jaña tson'en kaxon, ko jaña ndo Dio tsjankata'inta ndo ijie.

<sup>13</sup> Siá xrojan ja'anta jitoni'e asáanta, nichje'enta ndo Dio. Siá xrojan ja'anta juaxruxin stenta, itsjenta ko tájonnta juasianta ngajin ndo Dio. <sup>14</sup> \*Siá xrojan ja'anta ni'anta, tiye'enta sen stetaon'annta, sen chónnda sen juachaxin ngaxin'in ni'ngo, ko je'e sen xronichje'e sen ndo Dio ko ixi juachaxien Ncháina Jesús tsake'e sen ndaxi'e ngata'a jaa sen ni'e. <sup>15</sup> Nchakon nichje'enta ndo Dio ko chuntianta ngajin ndo, me'e sen ni'e tsoxruen'en sen ko je'e ndo Dio sinchekaya ndo sen, ko siá xrojan ijie yama sen, je'e ndo sinchemé'e ndo kain

ti sínká sen. <sup>16</sup> Méxin, ja'anta ndachenta sen kichuunta nge'e ndako'a juinche'enta ixi jaña je'e sen xronichje'e sen ndo Dio, ko je'e ndo sinchexruan'anta ndo. Ixi sen ícha chuntia ndo Dio, je'e sen nichje'e sen ndo ko je'e ndo tin'en ndo nge'e tjanchia sen. <sup>17</sup> Ndo profeta Elías, bake'e ndo xranchi jaína, ko nchakon juanche'e ndo ndo Dio ixi nichijí aséen ndo ixi xrokui'a ichrin, jaña kon'en ko nduaxin kui'a ichrin ngata'a nunte ní nano ko tu'o. <sup>18</sup> Ko tjume'e je'e ndo Elías nichje'e ndo ndo Dio íjngo ko ndo Dio xruan'an ndo ichrin ngata'a nunte ko inche kuajon nge'e kuandáa sen. <sup>19</sup> Kichuuna, siá xrojan ja'anta tsachrjendáanta cha'o jian ko inaa sen sinchekjannta sen, <sup>20</sup> \*tono'anta ixi sen juinchekjan kichuu cha'o jian, sen me'e bingijna sen ixi tsitjáña'i aséen chujni me'e, ko ndo Dio sinchemé'e ndo itsjé ijie kuachónnda sen.